

容齋續筆

第二冊



容齋續

卷第六

宋史

嚴武不殺杜甫

新唐書嚴武傳云房琯以故宰相爲巡內刺史武慢倨不爲禮最厚杜甫然欲殺甫數矣李白爲蜀道難者爲房與杜危之也甫傳云武以世舊待甫甫見之或時不巾嘗醉登武牀瞪視曰嚴挺之乃有此兒武銜之一日欲殺甫冠鉤于簾三左右白其母奔救得止舊史但云甫性褊躁嘗憑醉登武牀斥其父名武不以爲忤初無

所謂欲殺之說蓋唐小說所載而新書以爲然
予按李白蜀道難本以譏章仇兼瓊前人嘗論
之矣甫集中詩凡爲武作者幾三十篇送其還
朝者曰江村獨歸處寂寞養殘生喜其再鎮蜀
曰得歸茅屋赴成都直爲文翁再剖符此猶是
武在時語至哭其歸觀及八哀詩記室得何遜
韜鈴延子荆蓋以自況空餘老賓客身上媿簪
纓又以自傷若果有欲殺之怨必不應眷眷如
此好事者但以武詩有莫倚善題鸚鵡賦之句

故用證前說引黃祖殺禰衡爲喻殆是癡人面
前不得說夢也武肯以黃祖自比乎

王嘉薦孔光

漢王嘉爲丞相以忠諫忤哀帝事下將軍朝者
光祿大夫孔光等劾嘉迷國罔上不道請與廷
尉雜治上可其奏光請謁者召嘉詣廷尉嘉對
吏自言不能進賢退不肖吏問主名嘉曰賢故
丞相孔光不能進嘉死後上覽其對思嘉言復
以光爲丞相按嘉之就獄由光逢君之惡而嘉

且死尚稱其賢嘉用忠直隕命名章一時然亦可謂不知人矣光之邪佞鬼所唾也奴事董賢協媚王莽爲漢蠹賊尚得爲賢也哉

朱溫三事

義理所在雖盜賊凶悖之人亦有不能違者劉仁恭爲盧龍節度使其子守文守滄州朱全忠引兵攻之城中食盡使人說以早降守文應之曰僕於幽州父子也梁王方以大義服天下若子叛父而來將安用之全忠愧其辭直爲之緩

攻其後還師悉焚諸營資糧在舟中者鑿而沉之守文遺全忠書曰城中數萬口不食數月矣與其焚之爲煙沉之爲泥願乞其所餘以救之全忠爲之留數困滄人賴以濟及篡唐之後蘇循及其子楷自謂有功於梁當不次擢用全忠薄其爲人以其爲唐鴟梟賣國求利勒循致仕斥楷歸田里宋州節度使進瑞麥省之不懌曰宋州今年水灾百姓不足何用此爲遣中使詰責之縣令除名此三事在他人爲不足道於全

忠則爲可書矣所謂憎而知其善也

文字潤筆

作文受謝自晉宋以來有之至唐始盛李邕傳邕尤長碑頌中朝衣冠及天下寺觀多齎持金帛往求其文前後所製月數百首受納饋遺亦至巨萬時議以爲自古鬻文獲財未有如邕者故杜詩云干謁滿其門碑版照四裔豐屋珊瑚鉤騏驎織成罽紫駟隨劒几義取無虛歲又有送斛斯六官詩云故人南郡去去索作碑錢本

賣文爲活翻令室倒懸蓋笑之也韓愈撰平淮
西碑憲宗以石本賜韓宏宏寄絹五百匹作王
用碑用男寄鞍馬并白玉帶劉义持愈金數斤
去曰此諛墓中人得耳不若與劉君爲壽愈不
能止劉禹錫祭愈文云公鼎侯碑志隧表阡一
字之價輦金如山皇甫湜爲裴度作福先寺碑
度贈以車馬繒綵甚厚湜大怒曰碑三千字字
三縑何遇我薄邪度笑酬以絹九千匹穆宗詔
蕭俛撰成德王士真碑俛辭曰王承宗事無可

書又撰進之後例得貺遺若黽勉受之則非平生之志帝從其請文宗時長安中爭爲碑誌若市買然天官卒其門如市至有喧競爭致不由喪家裴均之子持萬緡詣韋貫之求銘貫之曰吾寧餓死豈忍爲此哉白居易修香山寺記曰予與元微之定交於生死之間微之將薨以墓誌文見託旣而元氏之老狀其臧獲與馬綾帛洎銀鞍玉帶之物價當六七十萬爲謝文之贄予念平生分贄不當納徃反再三訖不得已回

施茲寺凡此利益功德應歸微之柳玘善書自
御史大夫貶瀘州刺史東川節度使顧彥暉請
書德政碑玘曰若以潤筆爲贈即不敢從命本
朝此風猶存唯蘇坡公於天下未嘗銘墓獨銘
五人皆盛德故謂富韓公司馬溫公趙清獻公
范蜀公張文定公也此外趙康靖公滕元發二
銘乃代文定所爲者在翰林日詔撰同知樞密
院趙瞻神道碑亦辭不作曾子開與彭器資爲
執友彭之亡曾公作銘彭之子以金帶縑帛爲

謝却之至再曰此文本以盡朋友之義若以貨見投非足下所以事父執之道也彭子皇懼而止此帖今藏其家

漢舉賢良

漢武帝建元元年詔舉賢良方正直言極諫之士丞相綰奏所舉賢良或治申商韓非蘇秦張儀之言亂國政請皆罷奏可是時對者百餘人帝獨善莊助對擢爲中大夫後六年當元光元年復詔舉賢良於是董仲舒等出焉資治通鑑

書仲舒所對爲建元按策問中云朕親耕籍田
勸孝弟崇有德使者冠蓋相望問勤勞恤孤獨
盡思極神對策曰陰陽錯繆氛氣充塞羣生寡
遂黎民未濟必非即位之始年也

戊爲武

十干戊字只與茂同音俗輩呼爲務非也吳中
術者又稱爲武偶閱舊五代史梁開平元年司
天監上言日辰內戊字請改爲武乃知亦有所
自也今北人語多曰武朱溫父名誠以戊類成

字故司天譌之耳

怨耦曰仇

左傳師服曰嘉耦曰妃怨耦曰仇古之命也注云自古有此言按許叔重說文於逌字上引虞書曰方逌孱功又曰怨匹曰逌然則出於虞書今亡矣以鳩倂爲逌孱以耦爲匹以仇爲逌其不同如此而倂字下所引乃曰旁救倂功自有二說旻字下引虞書曰仁閔覆下則稱旻天藝字下引虞書雉藝今皆無此

說文與經傳不同

許叔重在東漢與馬融鄭康成輩不甚相先後而所著說文引用經傳多與今文不同聊撫逐書十數條以示學者其字異而音同者不載所引周易百穀草木麗乎土爲艸木麤乎地服牛乘馬爲備音備牛乘馬夕惕若厲爲若夤其文蔚也爲斐也乘馬坵如爲驢如天地絪縕爲天地壹壹繡有衣袽爲需有衣絮書晉卦爲晉巽爲鼫良爲目所引書帝乃殂落爲勛乃殂竄三苗

爲窳

塞也音倅

三苗勿以儉人爲諛人

諛問也

在後之

侗爲在夏后之誦尚不思于凶德爲上不耆峙

乃糗糧爲餼糧教胄子爲教育子百工營求爲

復求至於屬婦爲嫗婦

嫗音繇妊身也

有疾弗豫爲有

疾不念我之弗辟爲不僻截截謫言爲戔戔巧

言又圜圜升雲半有半無獮有爪而不敢以擻

及以相陵慄維縑有稽之句皆云周書今所無

也所引詩旣伯旣禱爲旣禡旣禡新臺有泚爲

有毗焉得諼草爲安得憲艸牆有茨爲有薺棘

人變變爲嚮嚮江之永矣爲萊矣得此戚施爲
醜醜伐木許許爲所所儻儻俟俟爲伾伾俟俟
嘽嘽駱馬爲疹疹赤舄几几爲已已又爲擊擊
慳^{音慳}民之方殿屎爲方唸呶混夷駮矣爲犬夷呶
矣陶復陶穴爲陶窰^{地室也}其會如林爲其旌國
步斯頻爲斯曠滌滌山川爲蔽蔽論語荷蕢爲
荷吏褻褻爲結衣又有跂予之足一句孟子源
源而來爲諛諛^{音願徐也}接淅爲澆淅^{澆其兩切乾漬米也}左
傳尫涼爲牯涼芟夷爲癸^{音發}夷圭竇爲圭審澤

之荏蒲爲澤之目籩

禁苑也

袁甸兩牡爲中佃一

轅楠柎藉幹爲楠部薦榦公羊闖然爲覲然

失覲

冉切暫見也

國語觥飯不及壺飧爲飧飯不及一食

如此者甚多

周亞夫

漢景帝即位三年七國同日反吳王至稱東帝
天下震動周亞夫一出即平之功亦不細矣而
訖死於非罪景帝雖未爲仁君然亦非好殺卿
大夫者何獨至亞夫而忍爲之竊嘗原其說亞